

尔时，佛告舍利弗：“止！止！不须复说。若说是事，一切世间诸天及人皆当惊疑。”

舍利弗重白佛言：“世尊，唯愿说之！唯愿说之！所以者何？是会无数百千万亿阿僧祇众生曾见诸佛，诸根猛利，智慧明了，闻佛所说则能敬信。”

尔时，舍利弗欲重宣此义，而说偈言：

“法王无上尊，唯说愿勿虑，  
是会无量众，有能敬信者。”

佛复止舍利弗：“若说是事，一切世间天、人、阿修罗皆当惊疑，增上慢比丘<sup>1</sup>将坠于大坑<sup>2</sup>。”

尔时，世尊重说偈言：

“止止不须说，我法妙难思，  
诸增上慢者，闻必不敬信。”

尔时，舍利弗重白佛言：“世尊，唯愿说之！唯愿说之！今此会中，如我等比百千万亿，世世已曾从佛受化。如此人等必能敬信，长夜安隐，多所饶益。”

<sup>1</sup>《维摩诘所说经·观众生品》云：[舍利弗言：‘不复以离淫怒痴为解脱乎？’天曰：‘佛为增上慢人，说离淫怒痴为解脱耳；若无增上慢者，佛说淫怒痴性，即是解脱。’舍利弗言：‘善哉！善哉！天女汝何所得？以何为证？辩乃如是！’天曰：‘我无得无证，故辩如是，所以者何？若有得有证者，则于佛法为增上慢。’]

<sup>2</sup>《净心诫观法》云：

若见重愚痴，莫说甚深法，  
闻者生诽谤，受苦百千劫。  
宿世无习气，闻法疑恐惧，  
我见计断常，未信三世业。  
量根授法药，是名大智人，  
心邪无正见，闻法反生瞋。  
如蚕吐丝茧，罪业复自缠，  
以不闻法故，常为爱网牵。

尔时，舍利弗欲重宣此义，而说偈言：

“无上两足尊，愿说第一法，我为佛长子，唯垂分别说。

是会无量众，能敬信此法，佛已曾世世，教化如是等。

皆一心合掌，欲听受佛语，我等千二百，及余求佛者。

愿为此众故，唯垂分别说，是等闻此法，则生大欢喜。”

尔时，世尊告舍利弗：“汝已殷勤三请，岂得不说？汝今谛听，善思念之，吾当为汝分别解说。”

说此语时，会中有比丘、比丘尼、优婆塞、优婆夷五千人等，即从座起，礼佛而退。所以者何？此辈罪根深重及增上慢，未得谓得，未证谓证，有如此失，是以不住。世尊默然而不制止。

尔时，佛告舍利弗：“我今此众无复枝叶，纯有贞实。舍利弗，如是增上慢人，退亦佳矣。汝今善听，当为汝说。”

舍利弗言：“唯然，世尊，愿乐欲闻。”

佛告舍利弗：“如是妙法，诸佛如来时乃说之，如优昙钵华时一现耳！舍利弗，汝等当信佛之所说，言不虚妄。舍利弗，诸佛随宜说法，意趣难解。所以者何？我以无数方便、种种因缘、譬喻言辞演说诸法，是法非思量分别之所能解，唯有诸佛乃能知之<sup>3</sup>。所以者何？诸佛世尊唯以一大事因缘故出现于世。

---

<sup>3</sup> 一、《大乘本生心地观经》云：

善逝恒为妙法船，能截爱流超彼岸，  
大智方便不可量，恒与众生无尽乐。

二、《究竟一乘宝性论》云：

非初非中后，不破坏不二，  
远离于三界，无垢无分别；  
此甚深境界，非二乘所知，  
具胜三昧慧，如是人能见。

“舍利弗，云何名诸佛世尊唯以一大事因缘故出现于世？诸佛世尊，欲令众生开佛知见<sup>4</sup>使得清净故出现于世，欲示众生佛之知见故出现于世，欲令众生悟佛知见故出现于世，欲令众生入佛知见道故出现于世。舍利弗，是为诸佛以一大事因缘故出现于世。”

佛告舍利弗：“诸佛如来但教化菩萨。诸有所作，常为一事，唯以佛之知见示悟众生。舍利弗，如来但以一佛乘故为众生说法，无有余乘若二若三<sup>5</sup>。舍利弗，一切十方诸佛法亦如是。”

“舍利弗，过去诸佛以无量无数方便、种种因缘、譬喻言辞，而为众生演说诸法，是法皆为一佛乘故。是诸众生从诸佛闻法，究竟皆得一切种智。舍利弗，未来诸佛当出于世，亦以无量无数方便、种种因缘、譬喻言辞，而为众生演说诸法，是法皆为一佛乘故。是诸众生从佛闻法，究竟皆得一切种智。舍利弗，现在十方无量百千万亿佛土中诸佛世尊，多所饶益安乐众生。是诸佛亦以无量无数方便、种种因缘、譬喻言辞，而为众生演说诸法，是法皆为一佛乘故。是诸众生从佛闻法，究竟皆得一切种智。舍利弗，是诸佛但教化菩萨，欲以佛之知见示众生故，欲以佛之知见悟众生故，欲令众生入佛之知见故。”

<sup>4</sup> 知见：《大智度论》云：

[问曰：解脱知见者，但言知，何以复言见？答曰：言知、言见，事得牢固；譬如绳二，合为一则牢固。复次，如从人诵读，分别筹量是名知；自身得证是名见。譬如耳闻其事，犹尚有疑，是名知；亲自目睹，了了无疑，是名见。解脱中知、见亦如是差别。]

<sup>5</sup> 《大乘入楞伽经》云：

天乘及梵乘，声闻缘觉乘，  
诸佛如来乘，诸乘我所说。  
乃至有心起，诸乘未究竟，  
彼心转灭已，无乘及乘者。  
无有乘建立，我说为一乘；  
为摄愚夫故，说诸乘差别。

“舍利弗，我今亦复如是，知诸众生有种种欲，深心所著，随其本性，以种种因缘、譬喻言辞、方便力而为说法。舍利弗，如此皆为得一佛乘、一切种智故。舍利弗，十方世界中尚无二乘，何况有三？舍利弗，诸佛出于五浊恶世，所谓劫浊、烦恼浊、众生浊、见浊、命浊。如是，舍利弗，劫浊乱时，众生垢重，慳贪嫉妒，成就诸不善根故，诸佛以方便力，于一佛乘分别说三。

“舍利弗，若我弟子，自谓阿罗汉、辟支佛者，不闻不知诸佛如来但教化菩萨事，此非佛弟子，非阿罗汉，非辟支佛。又舍利弗，是诸比丘、比丘尼，自谓已得阿罗汉，是最后身究竟涅槃，便不复志求阿耨多罗三藐三菩提，当知此辈皆是增上慢人。所以者何？若有比丘实得阿罗汉，若不信此法，无有是处；除佛灭度后，现前无佛。所以者何？佛灭度后，如是等经，受持读诵解义者，是人难得。若遇余佛，于此法中便得决了。舍利弗，汝等当一心信解受持佛语。诸佛如来言无虚妄，无有余乘，唯一佛乘<sup>6</sup>。”

尔时，世尊欲重宣此义，而说偈言：

“比丘比丘尼，有怀增上慢，优婆塞我慢，优婆夷不信，  
如是四众等，其数有五千，不自见其过，于戒有缺漏，  
护惜其瑕疵，是小智已出，众中之糟糠，佛威德故去。  
斯人鲜福德，不堪受是法，此众无枝叶，唯有诸贞实。  
“舍利弗善听，诸佛所得法，无量方便力，而为众生说。  
众生心所念，种种所行道，若干诸欲性，先世善恶业，

<sup>6</sup>《大乘入楞伽经》云：[佛言：“大慧！觉二无我，除二种障，离二种死，断二烦恼，是佛体性。大慧！声闻、缘觉得此法已，亦名为佛，我以是义但说一乘。”]

佛悉知是已，以诸缘譬喻，言辞方便力，令一切欢喜。

或说修多罗<sup>7</sup>，伽陀<sup>8</sup>及本事<sup>9</sup>，本生<sup>10</sup>未曾有<sup>11</sup>，亦说于因缘<sup>12</sup>，

譬喻<sup>13</sup>并祇夜<sup>14</sup>，优波提舍<sup>15</sup>经。钝根乐小法，贪著于生死，

于诸无量佛，不行深妙道，众苦所恼乱，为是说涅槃。

我设是方便，令得入佛慧，未曾说汝等，当得成佛道。

所以未曾说，说时未至故，今正是其时，决定说大乘。

我此九部法，随顺众生说，入大乘为本，以故说是经。

有佛子心净，柔软亦利根，无量诸佛所，而行深妙道，

为此诸佛子，说是大乘经。我记如是人，来世成佛道，

以深心念佛，修持净戒故。此等闻得佛，大喜充遍身，

佛知彼心行，故为说大乘。声闻若菩萨，闻我所说法，

乃至于一偈，皆成佛无疑。十方佛土中，唯有一乘法，

不二亦无三；除佛方便说，但以假名字，引导于众生。

<sup>7</sup> 修多罗：梵音，此云“契经”。怎么叫契经呢？契，契者合也，就是上契合诸佛的妙理，下契合众生的机缘。为九分教之一。

<sup>8</sup> 伽陀：意译“讽诵”。原为古印度的一种韵文文体，是一种歌谣。在佛教中，伽陀为九分教之一，句型长短不一，佛教中用这种文体，来串连文句，方便诵念、教授及学习佛教教义。

<sup>9</sup> 本事：意为“佛陀如此宣说”的经文，或讲述的弟子过去世发生的事；佛弟子过去世经历的有意义的故事称为本事，佛陀过去因地发生的故事则称为本生；为九分教之一。

<sup>10</sup> 本生：是记录佛陀还未成佛，即因地为菩萨时的前世故事。是九分教之一。

<sup>11</sup> 未曾有：指经中所说不可思议神异之事，如佛在说法前放大光明。如《佛说四未曾有法经》、《佛说未曾有因缘经》等，为九分教之一。

<sup>12</sup> 因缘：记录佛陀说法的三种因缘，即：有人请问，则回应说法；僧团中有人犯事，则制定相应戒律；遇到特别的事情，则相应说法。为九分教之一。

<sup>13</sup> 譬喻：意为佛陀“以世间之业缘事迹，比况解说教理，用以显明所说本义”。为九分教之一。

<sup>14</sup> 祇夜：义译为应颂或重颂，是与“修多罗”长行相对的韵文，将前文经文要旨简颂一遍，或将前数经的名目连成偈语，成为录偈，方便记忆讽诵。为九分教之一。

<sup>15</sup> 优波提舍：意译“论议经”。即对佛陀所说之教法，加以注解或衍义，使其意义更加显明，亦即经中问答论议之一类。为九分教之一。

说佛智慧故，诸佛出于世，唯此一事实，余二则非真，  
终不以小乘，济度于众生。佛自住大乘，如其所得法，  
定慧力庄严，以此度众生。自证无上道，大乘平等法，  
若以小乘化，乃至于一人，我则堕慳贪，此事为不可。  
若人信归佛，如来不欺诳，亦无贪嫉意，断诸法中恶，  
故佛于十方，而独无所畏。我以相严身，光明照世间，  
无量众所尊，为说实相印。“舍利弗当知，我本立誓愿，  
欲令一切众，如我等无异。如我昔所愿，今者已满足，  
化一切众生，皆令入佛道。若我遇众生，尽教以佛道，  
无智者错乱，迷惑不受教。我知此众生，未曾修善本，  
坚著于五欲，痴爱故生恼<sup>16</sup>，以诸欲因缘，坠堕三恶道，  
轮回六趣中，备受诸苦毒，受胎之微形，世世常增长。  
薄德少福人，众苦所逼迫！入邪见稠林，若有若无等，  
依止此诸见，具足六十二；深著虚妄法，坚受不可舍，  
我慢自矜高，谄曲心不实；于千万亿劫，不闻佛名字，  
亦不闻正法，如是人难度。是故舍利弗，我为设方便，  
说诸尽苦道，示之以涅槃。我虽说涅槃，是亦非真灭，  
诸法从本来，常自寂灭相。佛子行道已，来世得作佛，

<sup>16</sup> 《方广大庄严经》云：

若着五欲者，即失解脱乐。  
谁有智慧士，而求大苦因？  
若人未得欲，贪火极炽然，  
若已得之者，转复无厌足。

我有方便力，开示三乘法。一切诸世尊，皆说一乘道，  
今此诸大众，皆应除疑惑，诸佛语无异，唯一无二乘。  
过去无数劫，无量灭度佛，百千万亿种，其数不可量；  
如是诸世尊，种种缘譬喻，无数方便力，演说诸法相；  
是诸世尊等，皆说一乘法，化无量众生，令入于佛道。  
又诸大圣主，知一切世间，天人群生类，深心之所欲，  
更以异方便，助显第一义<sup>17</sup>。若有众生类，值诸过去佛，  
若闻法布施，或持戒忍辱，精进禅智等，种种修福慧，  
如是诸人等，皆已成佛道。诸佛灭度已，若人善软心，  
如是诸众生，皆已成佛道。诸佛灭度已，供养舍利者，  
起万亿种塔，金银及玻璃，砗磲与玛瑙，玫瑰琉璃珠，  
清净广严饰，庄校于诸塔；或有起石庙，栴檀及沉水，  
木欂<sup>18</sup>并余材，埵<sup>19</sup>瓦泥土等；若于旷野中，积土成佛庙，  
乃至童子戏，聚沙为佛塔，如是诸人等，皆已成佛道。  
若人为佛故，建立诸形像，刻雕成众相，皆已成佛道。  
或以七宝成，鍍石<sup>20</sup>赤白铜，白镵<sup>21</sup>及铅锡，铁木及与泥，

<sup>17</sup> 《大般涅槃经》云：“善男子！如来普为诸众生故，虽知诸法，说言不知，虽见诸法，说言不见，有相之法说言无相，无相之法说言有相，实有无常说言有常，实有有常说言无常，我乐净等亦复如是。三乘之法说言一乘，一乘之法随宜说三，略相说广，广相说略，四重之法说偷兰遮，偷兰遮法说言四重，犯说非犯，非犯说犯，轻罪说重，重罪说轻。何以故？如来明见众生根故。善男子！如来虽作是说，终无虚妄。何以故？虚妄之语即是罪过，如来悉断一切罪过，云何当有虚妄语耶？善男子！如来虽无虚妄之言，若知众生因虚妄说得法利者，随宜方便则为说之。”

<sup>18</sup> 木欂：古书上说的一种似槐的香木。

<sup>19</sup> 埵：拼音 zhuān，古同“砖”。

<sup>20</sup> 鍍石：拼音：tōu shí，指天然的黄铜矿或自然铜。

<sup>21</sup> 白镵：拼音 bái là，锡的别名。

或以胶漆布，严饰作佛像，如是诸人等，皆已成佛道。  
彩画作佛像，百福庄严相，自作若使人，皆已成佛道。  
乃至童子戏，若草木及笔，或以指爪甲，而画作佛像，  
如是诸人等，渐渐积功德，具足大悲心，皆已成佛道，  
但化诸菩萨，度脱无量众。若人于塔庙，宝像及画像，  
以华香幡盖，敬心而供养；若使人作乐，击鼓吹角贝，  
箫笛琴箜篌，琵琶铙<sup>22</sup>铜钹<sup>23</sup>，如是众妙音，尽持以供养；  
或以欢喜心，歌呗颂佛德，乃至一小音，皆已成佛道<sup>24</sup>。  
若人散乱心，乃至以一华，供养于画像，渐见无数佛；  
或有人礼拜，或复但合掌，乃至举一手，或复小低头，  
以此供养像，渐见无量佛；自成无上道，广度无数众，  
入无余涅槃，如薪尽火灭。若人散乱心，入于塔庙中，  
一称南无佛，皆已成佛道。于诸过去佛，在世或灭度，  
若有闻是法，皆已成佛道。未来诸世尊，其数无有量，  
是诸如来等，亦方便说法。一切诸如来，以无量方便，  
度脱诸众生，入佛无漏智，若有闻法者，无一不成佛。  
诸佛本誓愿，我所行佛道，普欲令众生，亦同得此道。

<sup>22</sup> 铙：拼音 náo，铜质圆形的打击乐器，比钹大。

<sup>23</sup> 铜钹：拼音 tóng bó，钹又作铜钹、铜钹子、或铜钵子、亦称铜盘、铙钹等。用响铜所造，其形如圆盘，中央隆起如丸状，中心穿一小孔，系以布缕，两片互击而鸣奏之。

<sup>24</sup> 《大智度论》云：

赞佛功德时，令人烦恼薄，  
以此功德故，结尽诸垢灭。